

TENTAMEN MEDICUM
INAUGURALE,

DE

V E N E N I S:

Q U O D,

ANNUENTE SUMMO NUMINE,

Ex Auctoritate Reverendi admodum Viri,

GULIELMI ROBERTSON, SS. T. P.

ACADEMIÆ EDINBURGENÆ PRÆFECTI;

NEC NON

Amplissimi SENATUS ACADEMICI consensu,

Et nobilissimæ FACULTATIS MEDICÆ decreto;

PRO GRADU DOCTORIS,

SUMMISQUE IN MEDICINA HONORIBUS ET PRIVILEGIIS

RITE ET LEGITIME CONSEQUENDIS;

Eruditorum examini subjicit

GULIELMUS HARVEY,

HIBERNUS.

A. B. Coll. SS. et Indiv. Trin. juxta Dub.

Ad Id, Septembris, hora locoque solitis.

Nos haec novimus esse nihil.

MART.

EDINBURGI:

Apud BALFOUR et SMELLIE,

Academiae Typographos.

M,DCC,LXXIV.

Patri suo optimo,

In perpetuum colendo,

REV. ADAMO HARVEY,

Apud Strabane in Hibernia degenti ;

Nec non,

Viris praestantissimis,

GEORGIO CLEGHORN, M. D.

Et in Collegio SS. et Individ. Trin.

Juxta Dublinium Anatom. Prof.

Et

GULIELMO CULLEN,

Praef. et Elect. Med. Reg. Primar.

Et in Acad. Edinb. Medicin. Prof.

Illi pietatis, His animi haud ingrati,

Exiguum hoc testimonium

Offert

AUCTOR.

For

Doct^r. Sims

from his friend

The Author.

TENTAMEN MEDICUM,

DE

V E N E N I S.

PROOEMIUM.

SCIENTIA et artibus, nondum ultra primordia sua longe provectis, homines cuivis substantiae vel corpori ingestae, vel extrinsecus admotae, et quamlibet oeconomiae mutationem notabilem inferenti, idem nomen tribuere consueverunt. Hinc, cum apud Graecos, cum apud Romanos, *φαρμακον* et venenum idem sonant, et venena strictius dicta, et medicamenta significantia. Experientia tandem inducti, haec duas in classes discerpere coeperunt. Quae morbis auxilio esse didicere, medicamenta, quae haud absque periculo adhiberi potuerint, venena nuncuparunt.

In omni societate rudi et barbara, moribus humanis adhuc feris et incultis, quatenus credulitas

tas et superstitio invalescunt, eatenus semper veneficium, cantio, et medicina, inter se arcte conjuncta reperiuntur. Caeterum, progressui in scientia semper pro rata ratione medicina respondet; et dogmata medica philosophiam singulis saeculis propriam admodum sapere solent. Hinc quoque, quamquam rudes et ignorantes artem medicinalem saepius exercuisse fateamur oportet; doctissimos tamen studium ejus non despectui habuisse cogere possumus.

Cum medicamenta * optima hodierna ab ordine venenorum per medicorum solertiam industriamque petita sint, animum nostrum ad hasce substantias, quae adhuc pro venenis habeantur, diligenter considerandas adjungere debemus. Quamvis quidem complures ex illis in classem medicamentorum redigere nunquam poterimus; qui tamen studiis hujuscemodi operam sedulo navaverint, gloriam exinde non parvam sibi consequentur, mortalibusque reliquis quam maxime consulent.

Sicuti omnis fere medicinae pars fictis vanis perplexisque obruitur, ita argumentum quod jam tracta-

* Hoc fatis probant, antimonium, hydrargyrus, opium, cicuta, &c, olim pro venenis habita.

tractaturi sumus, obscuritatibus suis minime vacat. Hanc ob causam, historias fabulosas et incredibiles silentio praeterire decrevimus. Cur enim commemorem, quod quidem omni fide indignum est, peritiam veneficorum tantam esse potuisse, ut alter, ipse tutus, alteri per halitum oris solum, exitio esse potuerit? Quendam Indorum regulum pulchram servam ita veneficiis erudire potuisse, ut Alexandro Magno dono data, perniciiei certae, idque prima nocte novo domino foret. Nec vana plurima, quae de Medea, Circe, Canidia, caeterisque narrantur, hic loci referenda ducimus. Quis sanus Theophrasto fidem haberet, qui nonnullos esse affirmare non dubitaverit, qui prout plus minusve toxicum poculo admiscuissent, quemlibet momento quovis, ab eodem die, quo venenum datum esset, ad duos annos expletos usque tollere scirent. Quinetiam artem eandem nonnullae Africae gentes novisse, et diem supremum in sex annos usque differre potuisse feruntur. His etiamnum magis incredibilia Sennertus narrat, scilicet nonnullos venenum tamdiu assumere consuevisse, ut ipsi in venena versi, prima nocte exitio forent uxoribus. Nec a vero minus abhorrent, quae de Parasatide et Statira Ctesias narravit. Parasatida scilicet alteram
ram

DE VÈNENIS.

ram cultelli partem veneno imbuiffe, aviculam eo diviffisse, partemque veneno infectam Statirae, quae perniciem ei statim inferret, dediffe, dum ipsa, omnis noxae expers et immunis, alteram aviculae partem impune devorare posset. Quae Mithridatem Hannibalemque spectant, tacebo; namque, cur ea longius prosequar, quae fidei omnino repugnant? Quis sibi priorem adversus omnes veneni vires, per opem antidoti, tutum esse potuisse, persuasum habere potest? Nonne tum venenum, tum antidotum, ex aequo inertia fuisse magis probabile est? Quod ad posteriorem attinet, cum copiam veneni in annulo satis largam gestare potuisse, cum verisimilitudine omnino pugnare videtur.

Quo clarius naturam perspectam quivis habebit, eo pauciora venena reperiet. Hinc artes veneficorum, apud barbaros, semper plurimum celebratae fuerint; licet substantiae, ni admodum fallor, lethales, apud gentes magis excultas, quae vero illis minore cum periculo uti noverunt, melius innotescunt. Gentes autem a barbarie longe alias, quibus damnatos, per opem veneni, e medio tollendi mos fuerit, venena praesentissima prorsus latuisse, ut mors Socratica plane testatur, quam evidentissime constat. Carnifex enim So-

cratem

cratem nimis acriter disputantem interpellasse fertur, ne venenum, illo loquente, effectus suos edere non posset. Cum Athenienses et eruditi et summa humanitate ornati fuerint, haud dubie venena valentissima quae illis innotescerent, quaeque miseros morte damnatos quam primum raperent, adhibenda curarent.

An Canidiam Plinio sagaciorem fuisse, vetulamve melius naturam veneni, et indolem, quam Redi celeberrimum, qui naturam sedulo observasset, et scripta tam antiquorum quam recentiorum labore indefesso evolvisset, intellexisse putes? Prout sagae et venena arcte inter se connectuntur, ita forsitan veritas utrorumque propemodum aequae fulcitur.

Vani autem terrores amoveantur, cum venena, eaque non minime virulenta, voluptatis animive causa, quotitidie assumi videamus. Gentem autem vix ullam esse, quantumcunque ad statum naturae, quod aiunt, rudem accefferit, artesque luxuriae ignoraverit, quae ab imperio venenorum narcoticorum prorsus immunis sit, hic loci notare conveniet. Hoc autem monendum est, omnino dubium esse utrum barbari insulam *Otaheite* dictam tenentes narcotica necne norint. Toxicum perniciosum per urbes, per gentes, oraesque ulti-

mas terrarum volat; Proteique instar, varias sibi induens formas, vinclis haud invitis, mortales correptos tenet.

Argumentum, quod tractaturi sumus, in capita duo dividetur. In priori, quae de venenorum natura in genere; in posteriori, quae de venenis potissimum dicenda, complectemur.

S E C T. I.

De Venenorum Natura in Genere.

Definitionem veneni accuratam claramque, quae omnes substantias sub hoc titulo enumeratas comprehendere possit, quaeque omnibus ex aequo accommodetur, tradere, et difficile et arduum. Subsequentem autem, nobismetipsis non parum diffusi, in medium proferemus.

Venenum est, quod, mole perexiguum, vel corpori ingestum, vel eidem quomodocunque admotum, potestatem vitae subito tollendae, ipsum vitale principium protinus abolendo, habet.

Hoc in nostra definitione praecipuum est, quod veneni naturam talem esse statuit, qualis principium vitae directe extinguat. Venena hucusque,

ab exiguitate copiae illorum agentis, et a malis subitaneis funestisque usum illorum excipientibus, definita fuerunt. Has notas vero prorsus ambiguas esse, hinc plane patescit, quoniam ad varias mortis causas referri possunt, quas tamen venena nemo sanus nuncuparet. Definitionem igitur limitibus angustioribus circumscribere, et istas substantias tantum venena dicere, quae admotae vitae principio, iisve conditionibus vitam praecipue proximeque sustentantibus, perniciem directo minitentur, necessarium ducimus. Si igitur substantias huiusmodi inveniri possent, eas non absque causa gravissima venena esse, seu copia maiore minoreve assumpta, seu serius citiusve mortem inferrent; vel, denique, licet in causa mortis non forent, dummodo facultatem vim vitalem abolendi, debilioremve reddendi ostenderent, concluderemus.

Hinc videre licet, principium vitae, modumque quo idem afficiatur, prius investiganda esse, quam venena aliis a rebus rite dignosci possint.

Quocirca sequentia generalia notare non alienum erit.

1mo, Facultatem sensus motusque exercendi statum animantium vitalem praecipue designare.

2do,

2do, Sensum motumque esse functiones systematis nervosi.

3tio, Systema * nervosum functionibus sibi propriis accommodari, ut ex eo patet, quod ad motum ab impulsu multiplici receptum ab una parte in alteram facile propagandum idoneum est.

4to, Communicationem † motus, varias inter systematis nervosi partes, a fluido elastico subtili medullofae nervorum substantiae, quae motum secundum fibrarum cursum, et huncce per tractum solum peragi patiatur, inhaerenti pendere.

5to, Fibras musculares ‡ absque praesentia hujusce mobilis fluidi, motuve ejus cum illis communicato, agere nequire; et igitur necesse esse ut fluidum hujusmodi in nervis fibrisque animantium motricibus existat, et actionem cordis musculive cujuslibet praecedat.

6to, A supra positis liquere, mobile fluidum, quod in nervis fibrisque motricibus insit, vitae animantium esse principium.

Hisce, jam ope physiologiae, et stabilitis et confirmatis, proximum est, uti notemus sat verisimile esse, statum hujus fluidi mobilissimi, seu humoris

* Vid. Cull. Physiolog. § 30.

† Vid. notam praecitato paragrapho annexam.

‡ Vid. Physiolog. jam citat. § 87.

moris vitalis, aliis sub rebus circumstantibus, conditionibus * aliis longeque diversis, subjici. Namque gradum frigoris certum sensum motumque, et unumquodque † vitae animalis signum, tollere; et functiones vitae, calore admoto, saepe rursus redire restaurique, neminem latere potest. Hoc autem non aliter, quam per facultatem illam insignem qua calor frigusque fluidi, quod in systemate animalium nervoso residat, et a quo functiones vitae universae a primordio usque pendent, mobilitatem excitent vel aboleant, poteris explicare. Ita nobis persuasum habemus, prima animantium rudimenta e tali materia conflare, qualis ad fluidum vitale recipiendum retinendumque accommodatur, qualisve hoc fluido quodammodo forsitan imbuitur; quae et tamen ea mobilitate, quae ad functiones animales exercendas idonea est, nondum fruitur, donec per caloris applicationem directo fuerit excitata.

Hanc autem nostram opinionem effectus caloris in incubatione singulares satis confirmant. Hic igitur ad omnia fere animantium rudimenta evolvenda et absolvenda necessarius reperatur.

Veri-

* Vid. Phys. ante citat. § 130. i. ii. iii. iv. v.

† Confer experimenta ab illust. Van. Swieten in vespertilionem instituta.

Verisimile quidem est, vitam animale a quodam excitationis mobilitatisve fluidi nervosi statu pendere. Hoc vero excitatum iterumque prorsus extinctum, mors excipiat necesse est.

Neque a vero abhorret, alias quoque praeter calorem et frigus potentias existere, quae excitationem fluidi vitalis adaugere et imminuere possint. Namque probabile est, statum somni vigiliaeque, per excitationem, qua fluidum vitale afficiatur, majorem minoremve tantum differre: Et cum potestates, quae somnum inducant, non deesse pateat, tales eas esse, quales excitationem nervosam imminuant; quae vero ulterius fortiusque agant, eas excitationem omnino tollere, lethique statum inferre, concludimus.

Potentias hujusmodi venena strictius appellamus; namque venena notiora hunc in modum primario agere, et, parva copia adsumpta, somnum tantum inducere, evidens perspicuumque est. Quinetiam theoria somni nostram veneni notionem sustentat, et in causa est cur idem excitationem systematis nervosi abolendo, et exinde mortem inferendo, agere credamus.

Theoriam somni absolutam haudquaquam hic loci tradere, caeterum eam, quo ratiocinium nostrum clarius apertiusque evadat, tantum raptim attingere

attingere nobiscum decrevimus. In primis autem animadvertendum est, cerebrum a natura conditionibus quietis mobilitatisque invicem se excipientibus esse destinatum; quod status somni et vigiliae alterni, omnium animalium communes, plane perspicueque testantur. Caeterum, quonam haecce constitutio singularis consistat, explicatu difficile.

Variae super hoc argumento sententiae invaluerunt; caeterum opinio, in quam plurimi medicorum concefferint, hujusmodi fuit; viz. cerebrum organum secretorium esse, quod fluidum functionibus systematis nervosi fecerneret, et hoc fluidum vicibus alternis exhauriri et reparari, statumque denique somni et vigiliae huic coacervationi et exhaustioni, pro rata ratione, respondere. Haec autem hypothesis multis difficultatibus urgetur.

Imo, Probabile est, fluidum nervosum, ante actionem cordis functionisve cujuslibet secretoriae, in embryone animali extitisse. Hoc vero tenebris magna ex parte involutum est; et forsitan nonnulli omnes corporis humani partes *simul et semel* formatas fuisse dicent; quam opinionem nec observatio nec analogia probe sustentare videntur. Quanquam universas corporis partes serie continuata

tinuata formari probare nequeamus, easdem tamen ordine quodam regulari evolvi, et cerebrum prius nervorumque rudimenta, quam reliquae systematis partes distincte animadvertantur, conspici posse constat. Cor autem tam brevi postea reperitur, ut actio cordis cerebrique simul nata fuisse et extitisse, forsitan non absque causa, credatur. Cum vero cor machina mera, quatenus natura irritabili praedita est, fluidorumque impulsui accommodata sit; cumque cerebrum irritabilitatis sensilitatisque fontem et originem esse pateat, cor ulla actionis suae signa prius edere, quam cerebrum, a quo contractilitatem, igiturque vim propellentem, deducit, quodammodo fuerit formatum potuisse, haudquaquam probabile videtur.

2do, In animalibus, velut vespertilionibus, &c. quae mortem, per hyemem, temporariam subeant, calore de novo vitam exfufcitante, vis vitalis prius solidis quam fluiditas sanguini restituitur. Quae huic somni theoriae objecimus, physiologos hac in re graviter errasse fatis evincunt; namque, si somnum a fluido nervoso exhausto, vigiliam a coacervato, et igitur ab eodem secreto, pendere verum foret, motus fluidorum, oscillationes solidorum

solidorum haud dubie praecessissent. Cum vero hoc non eveniat, illud falsum fit oportet.

3^{to}, Fluidum nervosum nervis fibrisque muscularibus a cerebro separatis, et etiam frustra in parvula divisis, tempus per diuturnum saepius inest.

4^{to}, Nihil apparatus ad temporariam fluidi secreti coacervationem necessarii in nervis usquam reperiundum est.

5^{to}, Ipsa somni vigiliaeque phaenomena hypothesein hujuscemodi plane repudiant; somnus etenim, quanquam magna fluidi secreti copia adfit, saepius accedit; vigiliaeque, contra, fluido praeter solitum exhausto, diutius produci potest.

6^{to}, Causae, quae in secretionem agere vix credi possint, statum utrumque inducunt.

Namque quarundam impressionum absentiam, attentionem in unam sensationem conversam, sensationesve istas, quae animum a cogitatione vel actione abducant, somnum inferre posse, manifeste constat: Dum hisce causis omnino contraria vigiliam facere consueverunt. Caeterum rebus hoc genus diutius immorari nequeo; si quis hoc argumentum melius scire voluerit, eum ad Physiologiam Cullenianam relego. Ex causis remotis somni vigiliaeque super perpen-

forſitan veriſimile videbitur, cauſam ſomni proximam a quadam fluidi nervoſi ipſius mutatione, nempe ab immobilitate quadam haſtenus inexplicata, unde ſyſtema totum ab agendo cogitandoque averſum evadit, pendere.

Quo difficultates, quae hanc theoriam urgeant, explicentur, et iisdem obviam eatur, obſervandum eſt, quod, licet vita praecipue et proxime a quadam fluidi nervoſi mobilitate pendeat, et, in aliquantulum temporis, cum reliquae functiones ceſſaverint, manere poſſit; quaedam functiones tamen, ut metam vitae communem excitatio attingat, vel ut ſatis diu invaleſcat, prorsus neceſſariae evadunt. Hae autem ſunt actio potiſſimum cordis et arteriarum, eorumque effectus, circuitus nempe ſanguineus, qui calorem corporeum tensionemque fibrarum cerebri neceſſariam ſuſtendendo, cum excitationem ſyſtemati nervoſo idoneam ſubminiſtrat, cum eandem perennem reddit.

Ex oeconomia animali hoc modo conſiderata, mortem animalibus ratione duplici inferre poſſe, viz. excitatione fluidi nervoſi et mobilitate *directe* ſublatis, vel functionibus ejuſdem excitationi, aut vitae ſuſtentandae neceſſariis *indirecte* interpellatis, pateſcit.

Ad

Ad causas mortis *directas* referenda sunt, affectus animi sedantes, frigus, venena, quaeque violenter excitando interimunt.

Quaquam status mortis nihil aliud quam integra mobilitatis fluidi nervosi privatio sit, hanc mobilitatem limitibus certis circumscribi, et immobilitatem aequae magnae omnem mobilitatis adauctae statum excipere, hic loci est observandum. Cum vero potestas hanc alternationem continuandi intra certos limites contineatur; mobilitatem in tantum excitari posse, ut in alternatione subeunda adeo deprimi possit, ut nunquam rursus excitata demum morte ipsa finiatur, quam facile videre est. Lassitudo, inertia, et somnolentia appetitum vehementiorem, cui ad plenum indulgeris, excipientes, ratiocinationem nostram non parum suffulciunt. Hinc ortus est aphorismus ille Aristotelicus, *omne animal post coitum triste*. Conditiones haec, in picturis suis *ante* et *post* appellatis, quam accurate lepideque delineavit *Hogarthius*, artifex ille celeberrimus. Hinc discimus, cur nonnulli, sub ipso *εξολασσεως* articulo, fato conferunt.

Quinetiam haec inertia alios, praeter venereum, appetitus spectat; nam omne animal brutum, ventriculo repleto fameve depulsa, in somnum inclinatur.

inclinat. Homo quoque vim affectionis ejusdem persentiscat. Cum hoc animali unicuique eveniat, nonne hinc naturam concoctioni per requiem auxiliari et faveri evidenter liquet? Neque non verisimile est, non tantum gaudium affectusque animi excitantes, sed etiam succussum electricum fulgoremque, excitando agere.

Causas autem *indirectas*, utpote quae a multis auctoribus satis fuse fuerint explicatae, silentio praetermittam; has causas vero, quae indirecte agant, solas attentionem medicorum, qui naturam venenorum exequentes in errorem elapsi sunt, in se convertisse observatu non indignum est. Eruditum vero Fredericum Hoffmannum indoles doctesque venenorum minime latuerunt. Interdum quidem causam mortis motui cordis arteriarumque cessanti refert, ut verba sequentia satis testantur: “Proxima cum mortis causa in plenaria cordis et sanguinis quiete consistat, sequitur sane ut omnia ea inferendae morti sufficiant, quae systolen atque diastolen cordis, sanguinisque circularem motum, ex toto auferre valent.”

Alibi tamen de venenis differens, quasi eum prioris sententiae poenituisset, in aliam plane concessit. “Alia tenui sulphure vaporoso narcotico enecant;

enecant ; quae, fluidum in membranis et nervis mobilissimum contaminando, cordis et aliorum solidorum systolen et robur auferunt.” Haec autem sententia et nostra inter sese fere conveniunt. Nec in aliam ivit Gaubius celeberrimus : “Longe plurima tamen, venena scilicet, inquit, eademque perniciosissima, ipsum vitale principium invadunt.”

Quamvis omnes substantias venenis annumeratas, excitationem systematis nervosi directe abolendo, effectus suos edere, aperte monstrare difficile foret ; cum tamen pleraque hunc in modum agere pateat, analogiaque actionem caeterarum propemodum eandem esse verisimile efficiat ; nomen venenorum iis solis, quae excitationem fluidi nervosi et immobilitatem imminuant, indendum putavimus.

S E C T, II.

De Venenis singularibus.

His de natura vitae mortisque, et modo quo principium vitae afficiatur, traditis ; proximum est,
ut

ut aliquid de venenis singularibus in medium proferamus.

Caeterum, ut omnia ad venenum spectantia quasi uno intuitu clare videantur, et ut omnes explanationes minus necessariae sint, ea in formam tabulae, a modis operationis suae desumptae, redigenda duximus.

Quo magis hocce argumentum consideravimus, eo difficilius esse visum est. Quam aegerrime vero venena ordine regulari disponantur, cum ratio actionis, variis in substantiis, propemodum infinita, cum effectus substantiarum earundem multiplices mutabilesque, clare demonstrant.

Quae Gaubius cel. de ratione actionis venenorum retulerit, ea videre pretium est. “ Neque satis exponendum, qua fit ut alia prae aliis velocius aut lentius, inque alias et alias partes ac functiones, modisque longe diversissimis, inexplicabili plane varietate, suam saevitiam exercent. Parum profecto vel acutissima etiam ingenia hic promoverunt. Nec minus difficilis indaginis istud quoque est, quod venena quaelibet non cuivis indiscriminatim homini aequae noceant, nec eidem quovis demum modo admota. Alia quippe vapore aëri admixto, in spiracula corporis admisso, operantur; alia in vulnere tantum, quae quidem inertia

inertia reddere vis ventriculi valet, alia aliis modis; nonnulla etiam quibuscunque. Haec, uti observando discimus, ita qua fiunt ratione explicatu arduum est."

Cum modus, quo venena operentur adeo obscurus, tanque densa caligine obductus sit, cumque tabulam nostram ab hoc praecipue deduci confiteamur oporteat, rationem, qua ea ordina-verimus quodammodo conjecturalem esse non ignoramus. An ergo ignorantiam nostram nos confiteri pudebit, cum tot duces hac in re illustres, de quorum laudibus doctrinaque nulla unquam aetas conticescit, quos sequamur, habeamus? Non enim notam ignorantiae sibi iniustam esse censuit vir ille cel. iteratisque experimentis unice fidens, Franciscus Reditus, dum actionem viperini veneni sibi ignotum * esse confiteretur. Cum vero omnia nobis scire non datum sit, aliqua tamen investigatio methodica, quae, quatenus res veras colligit, expendit, feligit, explicatque, ad veritatem, sive legibus suis stabiliendis attentioneve mortalium excitanda, magnopere conferat, necessaria est. Namque numerus systematum recentiorum magnus rationem hodiernorum haudquaquam

* Vid. Osservazioni intorno alle vipere, p. 42. ediz. di Firenze, 1686.

quaquam imbecilliores esse, aut in pejus ruere; contra vero illos libere audacterque cogitare, et non in verba aliena jurare, luculenter demonstrat.

I. Venena directa; i. e. quae, in systema nervosum agendo, vitam extinguunt.

1. Sedantia, seu quae vim nerveam abolendo mortem inferunt.

A. Quae mobilitatem morbidam creando effectus suos edunt;

a. Rabies canina.

B. Quae in partem, cui sunt admota, ut stimulantia, sed in systema universum, ut sedantia, agunt.

a. Animalia, prout vipera, Seneka, Gecco, Aspis, &c.

b. Mineralia, ut arsenicum.

C. Quae, in sensorium primario agendo, occidunt;

Miasmata, contagium, aër mephiticus, cujus species nonnullae solummodo intelligendae, velut aër a fodinis, cavernis, fermentatione, carbone ardente, aquis quibusdam mineralibus, vapores e metallis et sulphure, oriunda. Quaedam

dam e plantis, scilicet hyoscyamus, opium, cicuta aquatica Wepferi, nux vomica, aconitum, stramonii species, seu datura ferox *Linnaei*, solanum lethale, aqua ex lauro-cerasi foliis distillata, oleum nicotianae, oleum ex nucleis ceraforum nigrorum, amygdalarum amararum, aliisque hoc genus distillatum.

D. Quae per putredinem agunt ; velut quaedam ex regno animali, ut seps tabicus, haemorrhoids ; necnon e plantis, lolium temulentum. Ad hoc caput quoque referendi vapores e sphacelo, in qualibet corporis parte vitae principio nequitquam necessaria ortum ducentes.

II. Venena indirecta, i. e. quae, laesa structura organica, interimunt.

I. Stimulantia, i. e. quae per inflammationem in parte cui sunt admota excitatam, et per nexum momentumque organi affecti mortem gignunt, ut cantharides, euphorbium, coronae imperialis radix, cocula, helleborus albus, multaue alia naturae acris. Mechanica quaedam, ut fragmenta vitrea, metallica, &c.

2. Corrosiva, i. e. quae in corpus humanum, tum mortuum, tum vivum, agunt, et quae mixti animalis dissolutione perducunt, prout acida admodum concentrata, sales quidam metallici, aurum fulminans, causticum lunare, butyrum antimonii, vitriolum viride et caeruleum, mercurius corrosivus sublimatus, nec non alia & praeparata, alkali causticum, &c.

Omnia fere, quae pro venenis habeantur, in hac tabula complecti conati sumus; classem vero secundam inter et nostram veneni notionem aliquid differentiae intercedere fatendum. Caeterum, ut ordinem rerum, parvula copia saepius agentium, et effectus subitaneos funestosque nonnunquam edentium, non omitteremus, eos seorsim sub classe venenorum indirecte agentium, praesertim cum ordo modusque actionis suae inter sese plurimum convenire videantur, collocare non alienum fore sumus opinati.

Venena, quae haecce tabella complectatur, non figillatim minuteque perpendere, sed paucula tantum de praecipuis illorum notare nobis in animo est. Venenum nullum hucusque mortalibus inno-

innotuit, cujus virus tam atrox fit, tamque hominem immutet, quodque, ubi se prodere coepit, tam violenter celeriterque faeviat, et nihilominus tamen adeo diu latere possit, antequam se manifestet, quam rabies canina. Quicumque historiam hujus morbi fusius exaratam videre voluerit, aphorismos Boerhaavii ab 1128 ad 1147 usque, Ill. Richardum Meadium de hydrophobia, et observationes cl. Hillarii a pagina 248. edit. 2. ad 276 usque, consulat. Quanquam actio cujuslibet potentiae in machinam animale[m] haud semper eadem sit, sed diversos pro conditionibus oeconomiae diversis effectus edat; cum tamen hoc virus per lassitudinem, languorem, vires quam maxime imminutas, anorexiam, solitudinis desiderium veternum, multa[m]que alia sedantis fortiter agentis signa, se manifestet, id sub classe sedantium collocavi. Cum hoc virus mobilitatem gignendo mortem inferat, nonnulla symptomata actionem ejus concomitantia recensere sufficiet.

Objectorum in sensus impressionem aegerrime ferunt miserandi aegroti, attractatus quilibet dolori est, sonitus etiam levissimus molestiam adfert, motus forium, dum aperiuntur occludunturve, terrorem aequae ac domus ruina movet. Oculi lucem adeo refugiunt, ut rei cujuslibet albidac
con-

conſpectum ferre nequeant. Pulmonibus aura levis ingrata eſt, dolorem viis in urinariis, etiam lotii egeſtio, movere conſuevit.

Omnia ſymptomata ab adaucta ſenſilitate pendent, nec niſi finem morbi verſus incrementum caloris motuſve ſanguinei quodlibet, vel alia febris ſigna, adſunt. Cum nihil mutationis notabilis ſyſtemati ſanguifero ſit allatum, haec mobilitas mirabilis, niſi omnia me fallunt, per aliquam conditionis fluidi nervoſi ipſius mutationem progeneretur neceſſe eſt. Convulſiones, quae in ſignis huiusce veneni praecipuis ſunt, mobilitati plurimum adauctae tribuendae.

Aquae horror, difficultasve quemlibet humorem devorandi, motus convulſivos edens, per moleſtiam a fluido fauces contingente augetur. Cum fluidum nervoſum ſenſilitatis origo ſit, cumque rabies canina ut ſedans agat, i. e. ipſum ſenſilitatis fontem exhauriat; a me, hic loci, fortasſe quaeretur, cur operatio ejus, ſenſilitatis modum in mirificum adauctae, effectus edat? Huic reſponſum plenius accuratiusque referre, nos in pathologiae phyſiologiaeque interioria et recondita longe abduceret. Si quo tempore vero motus inordinati in ſyſtemate oriuntur, ſenſilitasque nimis adaucta, ſedantibus admotis, invaleſcit; aliquid corpori animato

ninato ingenitum, viz. *vim naturae medicatricem*, quae facultate nocivis obviam eundi praedita fit, agere protinus incipere, neminem qui medicinam primoribus labris gustaverit fugere potest.

Quandocunque phaenomena hujus facultatis insignis adsunt, ortum a vi vitali reagente, vel a naturae vigorem imminutum restaurari conante, deducunt. Verbis Gaubii cel. ad hoc argumentum stricte spectantibus, uti licebit. “Non bruta homo machina est, quae injurias sibi illatas iners excipiat et patiatur. Corpus enim sua praeditum est incitatione, quae moderata quidem in sanis, acrius insurgit praesenti malo irritata, inque enormes saepe impetus abripitur, ut morbi insultibus sese opponat.”

Hinc sensibilitatem adauctam per operationem opii subinde inferri, et, quo majores sunt vires animales, eo saepius redire patescit. Omnes hasce substantias, quae in statu haud satis concentrato, vel quantitate ad principium vitae extinguendum parum idonea, admoventur, renisus systematis evidenter insequitur; cum vero substantiae aliter sese habent, nihil renisus se ostendit. Illius forsitan rabies canina exemplum; hujus contagium pestilentielle a fomitibus sibi propriis, in statu admodum concentrato, oriundum praebebit. Aër
iste

iste perniciosissimus, *famiel* appellatus, pro alio forsitan exemplo habendus: De hoc modo sequente locutus est illustrissimus Hallerus: “ Continuo putrescunt quos ventus famiel percussit, ut membra tracta manum sequantur.” Num ex hoc aliquantulum probabile est, vim cohaesionis in animalibus a vi nervosa pendere? Nonne idem nobis suadere videtur, quod muscoli vivi pondera quam facillime possunt tolerare, quae eosdem adhuc incorruptos nullaque putredine affectos, sed tantum principio vitae orbatos, penitus dilacerarent.

Ad inceptum vero redeundum est, aliaque morbi symptomata considerandum. Quamvis incisio cadaverum organa deglutiendi aliqua ex parte inflammari testetur; virus tamen in modum stimulantis egisse, neutiquam exinde concludendum est. Namque, si spasmi in partem valde irritabilem invadunt, nihil obstat quo minus ipsa partis affectae vasa constringantur, renisusque deinde, ob irritamentum sensorio illatum, oriatur, qui actionem adauctam, motusque in vasis partis inordinatos, gignere consuevit; unde profluent inflammatio ejusdemque sequelae. Pars si quaelibet corporis fluente aëris frigidi fuerit objecta, rheumatismus acutus, pleuritis, variaque phlegmasi-

masiarum genera invadunt; et frigus vice sedantis functum fuisse, evidens perspicuumque est.

Quare muscoli pharyngis in rabie canina nunquam non convelluntur?

De characterē B. plerique forsitan ambigerent. Quamvis aegrius explicari possit, quomodo unum idemque partem certam stimulet, reliquumque systema sedet; rem nihilominus ita sese habere, exempla complura ostendunt. Opium vim in systema sedantem edere, inflammationem * tamen nonnunquam in parte, cui admoveatur, excitare, omnes uno ore fatentur. Alkali volatile partem quamlibet stimulat; motus vero systematis universi sedat. Camphora potestates motrices sedat; at inflammationes tamen locales saepe gignit. Nicotiana, parti cuilibet admota, dolorem inflammationemque movet; caeterum functiones sensorii confopit, et ebrietatem infert. Hyoscyamus somnum inducit, alvumque solvit. Alcohol, sive liquor quilibet spirituofus, partem quam contingit magnopere stimulat, pulsum arteriarum celerem efficit, dum, quod neminem latet, stuporem movet, dementiam infert, potestates

* Vide Alston's experiments on opium.

tes agendi inertes reddit, somnum profundum, &c. gignit.

Cum camphora, opium, nicotiana, hyoscyamus, &c. partem corporis aliquam stimulent, licet functiones animales sedent; hic loci rogari potest, cur illa sub eadem phalange, sub qua viperam et arsenicum, non collocaverim? Huic quam facillime quidem responderi potest; quanquam enim hoc phaenomenon nonnunquam oriatur; quatenus tamen hae substantiae ut venena agunt, nullum hujuscemodi effectum edunt. Igitur cum tabula de venenis tantum agat, ordinem ejus ab hisce rebus circumstantibus solis, quas venena ab aliis substantiis satis distinguere supra monstraverim deducendum putavi.

Quae signa a morfu viperino oriuntur, sunt dolor partis vulneratae acutus, tumor prius ruber, dein fuscus, qui latius sese diffundens partes sibi proximas occupat, vires admodum imminutae, pulsus celer et parvulus, necnon aliquando irregularis, gravis ventriculi aegritudo, vomitus convulsivus, sudores gelidi, deliquium animi reiteratum, delirium, stupor, mors.

Virus autem viperinum, cum actio ejus veterum, debilitatem, deliquium animi frequens moveat, adinstar sedantis agere videtur; dolorem ta-

men

men topicum, inflammationem, tumorem, phrenitida, pulsum celerem, dubitationem de hoc non parvam nobis injicere fatendum. Cum experimenta tamen ab illustri Meadio, varia in animalia instituta, perpenderimus, vim veneni viperini potius sedantem esse patebit. Varia, inquit, animalia, nempe canes, feles, et columbas, ab irata vipera mordenda curavimus; quae omnia serius citiusve moriebantur. Caeterum semper observavi, quod statim post morsum, una cum doloris acuti signis, indicia vitae admodum affectae, nempe per aegritudinem, deliquia, somnolentiam, convulsiones, &c. ediderint. Hoc, nisi fallimur, nostram opinionem confirmat. Deliquium frequens, somnolentia, et convulsiones, admodum deprimi testantur; dum dolor acutus et partis affectae inflammatio signa stimuli topici evidenter ostendunt. Virus autem viperinum nudis applicari nervis, et ipso commisceri sanguine, postulat: Sed hinc in fluida potissimum agere concludere non licet; namque humores officio vehiculi tantum funguntur, et symptomata tam celeriter morsum consequuntur, ut rationem eorundem justam, nec per leges absorptionis nec circuitus sanguinei, reddere possimus. Nonne hinc clare videre est, cur Cato reliquias exercitus Pompeiani, siti in-

toleranda laborantis, per Africam ducens, ut milites e fonte serpentibus venenosis scatente haurire non dubitarent, hortatus sit?

Noxia serpentum est admisto sanguine pestis :
 Morfu virus habent, et fatum dente minantur ;
 Pocula morte carent *.

Celsus quoque idem putasse videtur ; “ serpentes,” inquit, “ non gustu sed vulnere nocent †.”

Aliud symptoma, videlicet flavedo cutis, adhuc commemorandum superest. Hanc autem flavedinem ab affectu ductuum biliarium spasmodico, et a bile systema ingressa, oriri existimaverunt nonnulli ; caeterum in parte vulnerata semper incipit, et, gradatim latius sese diffundens, reliquas corporis partes invadit. Igitur a fero effuso, ut in febre Indorum Occidentalium flava, vel plaga corpori inflicta, accidit, ortum deducit.

Signa flavedinis universae opinionem supra positam ulterius sustentant ; namque tonum arteriarum exhalantium amissum esse, serum in telam cellulosa effusum demonstrat.

Morsus fenekae potestates vitae quam celeriter extinguit. Exemplum canis, 15 momentis,
 hoc

* Lucan. Pharsal. lib. ix. ver. 614.

† Cels. lib. v. cap. xxvii.

hæc modo sublati, in Actis Philosoph. Lond. No. 399. occurrit.

Si variis fabellis de Gecco traditis fides sit habenda, virus ejus præsentissimum vehentissimumque sit oportet. Gecco vero lacerti species est, cujus veneno sagittas Indi tingere consueverunt. His feras figunt, et vulnus levissimum per eas illatum immedicabile est. Hoc venenum autem modo sequente comparatur. Animal cauda suspensum verberando exasperant, donec virus emittit, deinde tela eodem imbuenda curant *.

Quantum ad aspidem spectat, quam paucissima credibilia reperies. Historia Cleopatrae, quæ asperas serpentes, ne superbo triumpho mulier non humilis decori esse cogeretur, tractare ausa fuerit, famam aspidibus haud dubie potissimum comparavit. Hoc autem nonnullis, vivas aspides a Cleopatra non adhibitas, sed toxicum per instrumentum aliquod venenatum in corpus infusum, forsitan assentiendum †.

Virus tarantulae nulli fundamini certo innititur, et pro mera fabula habendum; licet de veneno hujusce animalis admodum singulari quidem

* Vide Mead. de vipera.

† Brogiani de veneno animal. pag. 41. edit. 2. Florentiae 1754.

dem serio locutus sit Meadius. At quaedam inter sese longe diversa, etiam omnino contraria, huic viro illustri inesse, nempe credulitatem summam cum dubitatione maxima conjunctam, notandum est. Quam longissime quidem a me absit, ut aliquid famae hujusce viri eruditi detrahere coner; rem tamen ita sese habere confitebitur, quicumque tractatum de solis lunaeque imperio, medica sacra, &c. diligenter evolvat.

Omnia de salamandra memoriae prodita falsa sunt; nullum etenim animal hujusmodi extare compertum habetur. Varia animalia aculeis venenatis instructa ad eandem forsitan venenorum classem, quae viperam contineat, releganda sunt.

Opinio apud nonnullos invaluit, virus viperæ, senekæ, caeterorumque hujusce classis, vi septica potissimum agere; quod caro animalibus per venena illorum sublatis citius plerumque putrescat. Esto; conclusio tamen hujusmodi exinde non sequitur. Cum enim animalia per venenum viperinum, &c. interempta convulsionibus protinus exagitentur; effusiones necessario eveniunt, proclivitasque ad putredinem insolita, vel spasmis ipsis, vel contusionibus, quibus fibrae carnae quasi remollescunt, et ad putredinem igitur proniores fiunt,

fiunt, debetur. Neminem carnes contusas a putredine immunes conservare, difficillimum esse fugit.

Nulla arsenici species venenum aequè validum, ac illa quae alba chrySTALLINA appellatur, suppeditat, et, ante omnes alias, cum opus est, adhiberi solet. Hoc autem venenum eo magis periculosum est, quo difficilius a saccharo fecernitur; namque omnis saporis per se expers, et huic admistum dari consuevit, et ita corpore nostro receptum principium vitae celeriter extinguit, nisi potestati ejus nocivae protinus ab initio usque per vomitum repetitum occurras. Per opem vero chemiae facile detegi potest; namque, si lithargyri solutio illi affundatur, statim colorem nigrum sibi induit.

Sententiae de actione arsenici variae fuerunt. Alii vim septicam, alii stimulantem, illi inesse affirmarunt. Has vero sententias nec prorsus expellendas, nec ex toto admittendas, putamus. Quatenus dolorem inflammationemque in parte, cui admotum sit, excitat; eatenus pro stimulante habendum. Signa forsitan septica, operationem ejus excipientia, eodem modo, quo effectus iidem a vipera oriundi, explicanda sunt. Exempla
haud

haud pauca, cum apud Wepferum*, tum apud Sproegelum†, occurrunt, ubi extrinsecus admotum inflammationes movit. Multa vero exempla sunt, ubi mortem absque ullis inflammationis signis intulerit; et alia, ubi signa inflammationis adeo levia‡ fuerunt, ut vix pro causa mortis haberi possent. Si observationes celeb. Joannis Hunterii fidem mereantur, foramina parvula post mortem reperta potestati magis humoris gastrici solventi, quam cuilibet indoli arsenici ipsius erodenti, tribuenda sunt. Nonne arsenicum viribus narcoticis pollere, ab illo odore alliaceo, quem prunis candentibus injectum semper emittat, aliqua ex parte constare videtur? Quinetiam in illis exemplis, ubi extrinsecus admotum inflammationes excitaverit, mors adeo subito invasit, ut vix per vim stimulantem egisse credere possimus.

Quaquam cuti externae admoveatur, conatus ad vomendum quam maximi, et deinde convulsiones gravissimae, primis in signis, accedunt, tremoresque tandem continui mortem animalis praecedunt; cum inflammatio quoque ventriculum,
his

* Wepfer de cicut. aquat. edit. Basil. an. 1716. p. 289. † Dissertat. Inaug. Gottingae edit. 1753.

‡ Morgag. de causis et sed. morb. epist. anatom. medic. lix. art. 3.

his in exemplis in quibus arsenicum extrinsecus fuerit admotum, invadat, inflammationem violentis ad vomendum conatibus tribui debere patescit *; quanquam vis nervea per omnes corporis humani partes diffusa sit; nonnullae tamen sunt, in quibus vis vitalis potissimum dominare videtur. Hae autem sunt cerebrum, ventriculus, organaque quoque utriusque sexus genitalia. Hinc, omni in morbo gravi haec potissimum laboratura esse, videre est. Arsenicum partem, cui applicetur, stimulare, functiones vero animales universas sedare, experimenta non pauca ostendunt. Licet nauseam conatusque ad vomendum vehementes moveat; orificia tamen ventriculi, praesertim superius, adeo firmiter contracta sunt, ut nihil rejici queat. Ventriculus ad rupturam usque propemodum inflatus reperitur, adeo ut, punctura illi inflata, aer intus inclusus erumpens sonitum edat. Idem vero phaenomenon ab actione sedantium saepe proficiscitur. Num aer intus genitus ventriculum, tono ejus amisso, protinus inflat? Quamobrem vero contractio a causa relaxationis profluit? An verba Hoffmanni adhibere, “ atoniamque spasmos gignere,” dicere sufficit?

C. Quae

* Vide experiment. xxxvi. apud Sproegelium.

C. Quae in sensorium primitus agendo mortem inferunt. Omnia venena sub hac classe collocata functiones in universum sensorii, systematisque nervosi, potissimum adoriuntur; memoriam imminuunt, iudicium ex toto subruunt, stuporem inferunt, potestates insuper sanguinem promoventes debilitant, functiones naturales languidiores efficiunt, variaque facultatis admodum sedantis indicia edunt. Quamvis miasmata et contagia, quibusdam substantiis, impetum circuitus sanguinei magnopere adaugent, variosque motus excitant; hinc tamen in modum stimulantium agere neutiquam concludendum est.

Cuilibet pestem Massiliensem secum consideranti, historiasque portitorum perlegenti, quam cito hi miserandi absque ullis potestatis stimulantis indicibus extincti sint, evidenter liquebit. Exemplum multa apud varios auctores † commemorata, hanc venenorum classem per vim sedantem potissimum agere demonstrant. Doctrinam miasmatum contagiorumve, utpote quae a multis fusius tradita fuerit, ulterius prosequi omnino supervacaneum foret.

Varias

† Vide opera Lancisii, Pringelii, Lindi, &c.

Varias mephitici aëris species, easque innocuas, non deesse, clarus Priestleius nuper quam dilucide monstravit. Cum aër mephiticus membranae nares interiores vestienti admotus sensorium aggrediatur, cumque idem in ventriculo absque noxa oriatur, et fermentatio illinc originem sibi deducat; quaestio hic loci oriri potest, viz. a quam causa haecce differentia pendeat, curque aër mephiticus ventriculo pulmonibusve nihil omnino noceat, dum alibi, ex. gr. ad membranam supra dictam admotus, deliquium, soporem, et mortem infert?

Cum omne volatile, quodlibetve in aëre dissolutum, vel eidem innatans, hanc membranam potissimum percellat, num aër inquinatus, febres movens, per eandem intercedentem, sensorium nervosumve systema adficit? An huic opinioni favet ratio febres arcendi a Lindo celeberrimo collaudata, nempe per opem folii nicotianae convoluti nares occludere? Num venena quaedam certas partes tantum afficiunt?

Utrum inertia aëris mephitici in ventriculo et pulmonibus, ex habitu corporeo, vel ex quadam indole nervorum in hisce organis propria, pendet; an ex eo oritur, quod aër in ventriculo vel pul-

F

monibus

monibus semper adeo dilutus est, ut vires nocivas ostendere nequeat?

Varia aëris mephitici genera nociva, necnon vapores metallici sulphureique, cum vitam animalem extinguunt, speciem apoplexiae, illam scilicet a fluidi nervosi ipsius immobilitate oriundam, infert.

Saccharum Saturni silentio haudquaquam praetereundum est. Opium viribus suis nocivis propemodum adaequat, motum omnem ventriculi intestinorumque peristalticum abolet, irritabilitatem ac sensilitatem visceribus aufert, motum sanguineum vi nervosa perdenda sistit, paralyfin gignit, mortem inducit. Ex natura ejus ita perpensa, colicae Pictonum quam facile explicari possunt. Hinc quoque plane videre est, cur a medicinam facientibus, ut medicamentum adstringens, et in inflammationibus topicisque determinationibus tanta cum utilitate adhibeatur. Experimenta varia per virum egregium Sproegelium ex saccharo Saturni instituta conclusionem suprapositam confirmant.

Hyoscyāmus, opium, cicuta aquatica, aconitum, caeteraque narcotica sub hac classe comprehensa, multa symptomata sibi invicem simillima, nempe vertiginem, inertiam, animi deliquium, soporem, mortem, movent. Signa vero a
venenis

venenis hujuscemodi proficiscentia, pro dosi data, magnopere variant; haec tamen variatio opium potissimum spectat. Wepferus, in tractatu suo de cicuta aquatica excellentissimo, exemplum observatu dignissimum refert, ubi totum monasterium, radicibus hyoscyami chicoreique una comestis, signa notabilia, partim seria, partim ridicula, ostendit *.

Copia opii parvula alacritatem movet, cui tristitia debilitasque maximae succedunt. Cum quantitas contra talis est, qualis vitam perdere potest, corpus intremiscit, pedes et membra relaxantur, somnolentia, non verus tamen somnus, deinde quam maxima debilitas, tandemque sopor accedunt; et pulsus arteriarum ex intervallis incertis acceleratur, sensibilitasque admodum augefcit. Caeterum hoc memoria quoque tenendum est, omnes mutationes, quas fingere possis, in systema nervosum edi. Robur debilitasque, hilaritas et tristitia, torpor atque mobilitas, sensibilitas et insensibilitas, successio idearum rapida potestasve cogitandi penitus extincta, inter sese modum in mirum commiscentur. Quam densis tenebris involutus modus actionis ejus hucusque jaceat, haec signa,

* Vid. Lib. de cicut. p. 230.

signa, sibi invicem ex toto contraria, clare demonstrant. Si rationem actionis ejus rite perspectam haberemus, haec omnia symptomata, utcumque inter sese discrepant, ab una, eaque simplice causa, proficisci haud dubie videremus. Hoc autem nos ex toto fere latere minime mirandum est, cum partibus materiae etiam crassioribus dotes complures naturā indiderit, quae sensus nostros omnino fugiunt, licet effectus ab illis oriundi nobis innotescant.

Praeter vertiginem, soporem, delirium, et mortem, cicuta quam maximas in ventriculo anxietates movet, aegrotumque summo dolore adficere solet. Hinc forsitan vim stimulantem cum sedante conjunctam habere, cogere licebit *.

Quantum ad nucem vomicam attinet, nullas dotes, nisi fallor, admodum singulares habet; motus solummodo convulsivi, quos moveat, solito graviores sunt, ventriculusque vix unquam inflammatur. Et si hoc accidat, ab illa forsitan non oritur, quod ipse ad vomendum conatus effectusque ejusdem, speciem inflammationis praeseferunt.

Dotes

* Vid. Wepferum apud lib. citat. passim.

Dotes nicotianae et opio sibi invicem simillimae sunt; namque cuilibet parti corporeae admota, in causa sunt, cur ebrietas accedat. Quam subtilis igitur et penetrabilis spiritus rector hisce plantis insit, hinc non obscure videre est. Nul- lum venenum oleo nicotianae violentius est. Hinc ratio facile peti potest, cur illi, qui nicotiana, praesertim fumo ejus, utuntur, stupore, non ingrato tamen, corripiantur, ebrii fiant, et appetitus illis languescat, &c. Appetitus autem pro- sternitur, concoctioque illis nicotianam mandu- cantibus debilis evadit, potius ob vires ejus nar- coticas et sedantes, quam ob salivae dispendium, licet hoc ad effectus hujusmodi edendos sym- bolam suam conferre possit.

Olea e nucleis distillata aliquas dotes sibi pro- prias habent; nam extrinsecus admota effectus nullos, ventriculo recepta funestissimos, edunt. Nonne idem de venenis quibusdam dici potest, quae certas partes solas afficiunt? Nonnulla ve- nena sunt, quae vasorum actionem potissimum tollunt, et signa putredinis summa movent; unde seps tabicus nomen sibi adeptus est. Utrum vero animal hujusmodi necne sit, non parum am- bigo.

Haemorrhoids actionem vasorum penitus tol- lere, conditionemque humorum forsitan adeo mu-
tare,

tare, dicitur, ut sanguis illico e variis corporis partibus sese profundat.

Corpus quidem humanum structura sua cribrum refert, et, ni humorum tenacitas constrictiove vasorum quaedam foret, nihil omnino obstaret, quo minus sanguis e vasis undique protinus efflueret. Quinetiam, si virus hujuscemodi esse compertum haberes, cum haemorrhagiae tam brevi accedant, quomodo humores adeo repente mutari possint intellectu difficile. Igitur effectus ejus in systema nervosum potissimum edi concluderem.

Miles ab haemorrhoo vulneratus modum in horrendum apud Lucanum depingitur.

Sanguis erant lachrymae, quaecunque foramina novit
 Humor, ab his largus manat cruor, ora redundant,
 Et patulae nares, fudor rubet, omnia plenis
 Membra fluunt venis, totum est pro vulnere corpus.

Musa vero, uti credo, poetam nostrum longe ultra veritatem secum abripere nonnunquam videtur. Hoc autem nullibi forsitan magis conspicuum est, quam ubi rationem, qua viperæ coeant, describit.

—moriturum obſcoena maritum

Ore ſitit patulo ; caput inferit ille trilingue
Conjugis in fauces, atque oſcula fervidus intrat
Inſinuans oris coitu genitale venenum.
Nupta voluptatis vi faucia, mordicus hauſtum
Scindit amatoris blanda inter gaudia guttur.

Licentia vero poetis ſemper concedenda ; nam, ſi poeſis ornatu ſuo, a facultate imaginandi petito, orbata foret, nil præter fabulam anilem ſæpe reſtaret. Ætas igitur philoſophica, quæ omnia accurate et caute inveſtigat, muſis neutiquam amica eſt. Poeſis igitur epica quoque, ſocietate adhuc rudi, dumque ficta pro veris facilius habentur, potiſſimum florere reperitur.

Lolium, cum frumento admisceatur, effectus diros ſæpius edit, mortem partis alicujus, abſque tumore præcedente, deinde exſiccationem, in-durationem, nigredinem, gignens *. Cum hæc planta ſegetes ſæpe contaminaret, morboſque admodum funeſtos crearet, legiſſatores Britannici legem ferendam promulgandamque curarunt, qua mulcta omnibus irrogaretur, apud quoſcunque frumentum per hocce contaminatum venale proſtaret.

Claf-

* Vid. Sauvageſium ſub G. Necroſi.

Classem venenorum secundam characteres tabulae ipsius fatis explicant; nihil igitur de illa adjiciendum superest. Diverſae vero ſubſtantiae ibi enumeratae, ut vocabula ſcholastica adhibeam, tota proprietate et ſubſtantiae natura venena appellari nequeunt.

Nos tamen rationem, qua violentiam eorum compeſcere poſſimus, cautae medicorum celebri-um obſervationes, et temeraria empiricorum experimenta, edocuerunt; licet non parum noxae ab illis adhuc oriri fateamur neceſſe ſit. Idem fere de remedio quolibet efficaci dici poteſt; et hic loci verbis Medae uti licebit, “ Servare potui, perdere an poſſim, rogas ?

Licet venena corroſiva ſolida plerumque erodant, quoniam tamen effectus, ut ex vaporibus metallicis fatis conſtat, narcoticos quoque edunt, vim etiam narcoticam illis ineſſe perſpicuum eſt. Morte cani per mercurium corroſivum ſublimatum illata, nullum, uti Sproegeliuſ teſtatur, eroſionis aut inflammationis in toto ventriculo, vel alibi, ſignum repertum eſt.

Diverſa ſigna venenorum actionem concomitantia accurate depingere impoſſibile foret; caeterum forſitan non alienum eſſet notare, vertiginem primis in ſignis invadere, et a venenis narcoticis, ſitim vero ardentem a ſtimulantibus, ori-
ri.

ri. Quantitas data, symptomata magnopere immutat; quo major enim copia adhibetur, eo similia sunt signa. Symptomata vero singulis venenis propria per doses exiguas melius innotescunt. Ne minima quidem similitudo doses parvas inter et majores saepe intercedit. Hinc venena, eaque fortasse potentissima, in medicamenta utilissima converti possunt. Quodcunque datum mutationes magnas edit, id, si viribus ejus rite moderari possemus, utiliter adhibitum iri credimus. Quodcunque vero, contra, nulla actionis suae indicia monstrat, id pro inertis et inutili habendum opinamur. Quae effectus malos edere nequeunt, ab his parum boni sperandum. Hinc, quorsum ista regula praescribendi aurea, saltem non nocere tendat, haud obscurum est.

Unum adhuc commemorandum superest, quod actionem venenorum tenebris involutam esse ostendit. Multa, ut venena, in aliud animal agunt, quae alii nihil omnino nocent. Quodque magis adhuc miraberis, non tantum genera specierumque animantium diversae solae, sed etiam animalia ejusdem speciei diversa, idemque denique animal, diversis temporibus, modo longe diverso, afficiuntur. Capri et coturnices helleboro, sturni

cicuta, fues hyoscyamo, absque periculo victitant.

Ex observationibus clarorum virorum nuper ab illust. Carolo Linnaeo in Americam Septentrionalem, herbas colligendi gratia, missorum, constat, Rhus Glabrae virus non semper inesse, ferrosque modo, magistros modo, ab omni periculo prius immunes, subinde laedi. Ex quonam principio proprietates suas deducunt venena diversa? Num narcotica a modificatione principii phlogistici quadam? An stimulantia a principio salino? An ista venena, quae partem stimulant, systema vero universum sedant, a quadam principii salini phlogisticique conjunctione?

Quam parum his propositis respondeat, tenue hoc opus, sentio facile, nec diffiteor. Sed uti meliora vires meae, ita copiosiora temporis angustia, modusque dissertationibus hujusmodi praescriptus, edere non permiserunt. Quamobrem varia, etiam consulto, praetermissi, atque haec ipsa, ut aequi bonique consulat lector benevolus, rogare debeo. Plus oneris sustuli quam me ferre posse intelligo.

Est quodam prodire tenus, si non datur ultra: